

吾妻橋角客爭凭望斷春雲層一層水是三圍花四面  
紅濛濛裏醉騰騰

渡頭春水碧深深酒舫誰來淺淺斟不拉桃根俱買醉  
人如鷗夢太無心

款款偏宜盪畫橈沿花宛轉趁春潮誰家公子青驄馬  
空向牛王廟畔驕

長命寺荒芳草新萬花深處葬才人  
謂成島柳北 卽今弔柳傳  
嘉會蝶板鶯簧鬧一春

一江水膩暮風輕吹送箏琶簫笛聲東舫西船春蕩漾  
當中山影筑波橫

橫塘人散欲黃昏深柳煙藏月一痕好與攜壺登岸去  
亂鴉啼繞八洲園

園亭無主長青苔上有桃花帶笑開鬢影衣香相髣髴  
不教崔護感重來

文字相攜本偶然聯吟同上墨沱船旗亭卻唱嬉春句  
誰是楊家鐵笛仙

大隄曲

白帽烏帽相挈攜大兒小兒唱大隄不見山公習池馬  
落花終怨蹋銅鞮

大隄女兒楊柳旁舞腰纖勝邯鄲倡休瞋花豔驚郎目

別有蓮儂氣息香

六萌車轉落花香  
女伴爭來窺豔妝  
怪底錦帷加穩護  
鹿鳴館裏踏謠娘

歡心儂意共低摧  
一去春風不復回  
猶是上園鶯未老  
天家兩兩看花來

送姚志梁省親歸里 并序

往年志梁夢見其妹來告曰  
身今來蓬島海山縹緲  
洵難為懷只日夕與阿兄盤桓  
斯為慰耳正詫異間  
訃音俄至志梁悲之請予填詞  
以紀事未果今茲乙酉志梁告假  
六月將歸鄉國以介萱堂眉壽  
開別筵

於湖心亭席間談偶及此悵然賦七古一篇作贐

春風吹草婉婉柔湖波不動澹沲浮與君笑持滿觴酒  
闌前一擲東西流謾將聚散感萍絮此生誰不劫堂舟  
片帆乘風況飄忽羣賢贈行爭唱酬云君星槎來瀛洲  
汎汎萬里伴海鷗盈囊佳句詫畫錦循陔香草思晨羞  
云君愛弟亦寡儔 謂文 才名早已傳蓬丘巡檐同索膝前  
笑清癯知共梅花修 文枅竹作梅影詩偏索本朝諸名流之和 我獨停尊忽不御替君  
振觸非離愁彼嬋媛者白玉樓飄然乘風仙島游瞻望  
轉喜與兄近夢中恍惚君記不芙蓉城闕夜月隱冥冥  
花霧低簾鉤但因名心鉤不轉錯道夫婿真封侯 以其婿下第故致疾

前塵歷歷猶數得不悟身乃空中漚天桃弱絮拚薄命  
誰人於此先回頭小湖昨夜聽啼鳩知君和春去不留  
魂兮來些碧雲合空波凝絕盈盈眸風裳水佩忽無迹  
隔湖山影夕照收渭城一曲客皆散柳絲歷亂不可抽  
我歌悽惻君悵惘鄉關到日重夷猶欲言恐惹慈母淚  
只應暗說與子由再游有期詎可負莫使仙魂悲獨幽  
西風陌上桂香徧願君更趁槐花秋

聞志榮將應秋  
闈試結末故云

小園閒適

風簾平鋪香炷添竹君與我主賓兼夕陽隱隱隔幽樹  
葉影離離生翠簾山磬一聲雲不斷松花滿盃夢同甜

何須半日邀僧話詩味禪心信手拈

題畫

水流雲不去我醉客須歌有意攜琴少無心出岫多

夏初茉莉園新居卽事

濃陰依舊罨幽庭夢蝶牀頭午困醒碧酒一杯須蘸甲  
繡縐百日此添丁雨餘苔潤石逾古鶻後花空山自青  
猶有撩人春色在澹紅芍藥護茶廳

主客圖成覓句忙當門山影碧鬢涼新詩儘有燕脂氣  
舊夢無非茉莉香細雨小園花索莫故人遠道草蒼茫  
獨憐踈地垂楊柳鎮日依依拂畫牆

三橋三郊相次喬寓園中絃詩讀甚  
幾無虛日今皆以官命巡視各地方

閒情

春去閒情亦已空  
雨晴苔氣轉濛濛  
樹陰煙暝欲無綠  
籬角鐘搖看乍紅  
稱體薄衫涼醉後  
當頭新月灑杯中  
忽思水榭人方浴  
半鞦雲鬢泥晚風

哭田園曲

自道風人旨尚存  
憶田園後哭田園  
緣何苦說農家事  
為恐民飢不敢言  
布穀啼時麥未胎  
冥冥淫雨近黃梅  
勸農使者勸何事  
稻稅梁租從口催  
年年豐熟荷神明  
報賽千村鼓笛鳴  
今日忍飢來默禱

誰知神已啞無聲

采桑少婦采茶娘  
陌上相看淚數行  
阿妹嫁裝皆檻褸

阿姑常飯是糟糠

直置農人稼穡難  
不知馬上是何官  
揚鞭但說田家好

雨笠煙蓑做畫看

柴米油鹽醬醋茶  
一家七件是生涯  
忽然傳得京人語

課稅從今取次加

投耒歸來淚在頤  
瘦妻骨立尙撐持  
傷心不道炊無飯

泣撫牀頭索乳兒

如此辛酸若箇知  
為農只吃半生虧  
淚痕紅盡倉中米

可有官家減膳時

吾皇清暑翠微宮已見菖蒲益舜聰滿殿琴聲花漏午  
無人解講古幽風

成島柳北歿後倏忽已經半歲白鷗社諸人招同  
開追弔之筵余以事不赴賦此遙奠

德川何以載淳興君家王父能徵實室町何以淪胥亡  
後鑑一書乃翁筆興亡兩代褒貶俱亂臣賊子皆膽栗  
君也倜儻其匹稀遭逢聖世不受鞮甘從幕府稱遺老  
且向長安作布衣鶯花墨隄二三月春風柳橋絮亂飛  
笑指銀瓶邀客飲倒著接羅扶醉歸畫船日日催簫鼓

燕釵蟬鬢徵歌舞兼得風流楊鐵崖江南第一唐伯虎  
非朝非市非山林但與煙水相沈浸結撰荒唐花月史  
流傳一字抵千金笑罵文章聊放曠傳家翰墨堪舒暢  
館閣已多簪筆臣著論申戒非吾當隱諷好做滑稽雄  
頭銜合署風騷將遂壓百城南面王宛如霸者業新創  
正羨聲名騅共馳那知楚挽忽愀愴傷心草長虞美人  
渡口過者爲悵悵白鷗汎汎舊相馴而今浩蕩沒清淪  
婆娑楊柳仍遮舫冷落桃花誰問津遙知酌酒風蕭索  
斜曛點點晚潮落江上數峰生杳冥山陽一笛響寥廓  
悔予高會空蹉跎九原可作君謂何微官賴窺天府籍

每服著作君家多乃祖東照台德諸實紀寬政重修諸家贈乃父足利氏後鑑今省藏館閣為君述祖千秋業  
即此招魂一曲歌

永阪石埭玉池仙館招飲觀吳蘭雪姬人岳綠春  
墨蘭

玉娥池上玉闌干詩夢憑君訂古歡香篆碧縈雲作縷  
茶簾涼透月如紈展來紈佩美人畫愛與讀騷名士看  
知借仙魂三致意不應空谷歇芳蘭

題岳綠春墨蘭畫幅為夢樓主人石埭別號作

憶昨幽夢過瀟湘嬋媛親與紈芬芳煙姿霧質記恍惚  
醒來此畫挂在堂夢樓主人為指點綠春小字看端詳

料得人同明月色果然花有美人香美人家本姑蘇里  
好拈南國相思子轉因出塞怨琵琶何曾秉蘭涉溱洧  
停線時拖繡嶺雲傾脂羞照渾河水畫中同調菊夫人  
世外竝頭蓮博士博士風流鐵笛仙絕倫才調最翩翩  
為替孤芳憐獨立相逢一笑了前緣定情肯信羅紈薄  
寫照誰知粉墨妍蘭心蕙性依稀見猶想當窗展素箋  
螺黛初勻曉鬢櫛倩得一枝畫眉筆腕釧欲鬆衫影輕  
麝煤乍溼墨香密花花葉葉恰成雙澹澹濃濃態非一  
素心正受屈平憐夙根早被封姨嫉散盡聽香館裏花  
一時腸斷玉人斜花空泣露彈紅淚人亦如煙隔碧紗

往夢呼回秦吉了新魂招出楚哀些三十篇詩空唱徧  
天邊無路遇飄車傷心儘付主人說摩挲啼眼呼奇絕  
分明是我夢中人如見猗猗手自擷由來草木有榮枯  
知他聰慧早參徹長留一幅同心蘭不待才郎鬢似雪  
七月送史館諸僚友以命差遣各地

鋸嶽刺天仙島東刀川橫截海霞紅由來關左名山水  
有待周南太史公昔日金城空柱礎當年鐵騎悉英雄  
想君石室書搜徧贏得興亡感不窮田中義成小倉秀實兩家記  
隨重野副長官赴關東八州  
壯游似此果無虛先問東公起業初平楚綠連參遠野  
夕陽紅入織豐墟風雲倏爾霸終歇金碧儼然神所居

獨仰威靈如一日五鈴川水響前除鈴木圓二松浦辰男兩家記隨  
伊地知賴修赴遠參尾勢諸州

宮樹蒼涼噪晚鴉京畿風物尙繁華烏衣門巷故侯第

碧玉闌干新狹斜西寺鐘聲東寺雨南朝月色北朝花

若從斷簡搜遺事多在尋常百姓家菅政友佐佐木浚兩家記  
隨星野賴修赴五畿地方

送丸山子堅 赴任福島縣

淪落天涯惜異才羈栖苦被一官催白川殘照蘆笳冷  
赤館秋風鐵騎哀北地燕支心斷絕南枝越鳥夢低回  
青衫兼帶明妃淚并向琵琶亂灑來君精摘阮曾有  
合奏之約未果  
馬上琵琶舊淚痕天山極目接平原牛羊暮散叱童牧  
閭闔朝排暝帝闈謾與故人傷小別難爲新婦是初婚

他時任滿歸來日珍重須防薏苡冤

送佐藤雙峰精明乞假歸其鄉里磐城

山河半壁莽蕭條昔日戰場今黍苗會相之豪倏焱起  
永慶間事笑灰銷黃雲廢堡降旗現白草空墳野火燒  
滿日夕陽君到日亂蟬聲裏話漁樵

槐南集卷五

槐南集卷六

東京 森大來 公泰

乙酉

林櫟窗信將游清國觀西湖荷花戲賦八絕句意  
在借以誌湖山勝槩不專荷花故語無倫次

不道鴟夷自海東借來曲院萬荷風無端羞煞西施面  
一舸斜陽又鬧紅

蘇公隄下水如煙第四橋邊罨畫船幾日還過天竺寺  
問誰同坐合歡蓮

眼波眉語也通靈油壁迎君酒未醒剛報盈盈瓜欲破



儘人來摘聽鶯亭

聽鶯亭摘瓜張約齋西湖賞心樂事之一

幽探一路不勝情時復半閒堂下行亂草寒煙聞蟋蟀  
岳王墳畔獨無聲

蒼涼天水迹空陳德壽宮荒野草新一樣青山歌裏轉

可憐別是一家春

青山轉亡金時蓋謠也別是一家春亭名宋度宗新初或謂此非佳處後果驗

雷峰塔影夕陽閒崇福鐘聲暮鳥還猶唱菊花新曲破

更無人念舊家山

菊花新曲破崇福寺故事見武林舊事

一角孤山羅綺塵影疏香暗幾時春恨無萬樹梅花認  
四百年前舊主人

謾把後村詩句哦累人孤冷奈梅何自今一段蓮花案

翻向江湖集裏多

樂府文雅風流尤工韻語而隱於書賈故云

戲詠洋裝美人

裝束公然壓內家渾無膏沐絕鉛華翠擎螺影拳心髮  
薄透蟬痕罩面紗欲贈銀環通叩叩徐將錦繖且遮遮  
知郎未慣婆娑舞肯許輕挑繡袴斜

滿堂紅燭照羅襦傾盡葡萄酒百壺舞影翩跹雙鳳翼  
鏡痕濃寫十眉圖何人空谷還依草曾自深閨競賣珠  
只願有情為眷屬長教翠袖暮寒無

開慈善會

送北條鷗所

直方

漫游北海道

絃干山雀啼不了黑鷹側目血塗爪朔風吹撼平壤城

夜潮怒卷巨文島鳴乎時事不可量我友且游北海道  
乃欲足濯萬里流神超八極表眼無百二之山河胸有  
吞夢八九未定橐海天寥廓風颯沓帆檣千里如飛鳥  
船舷暝憂吟龍愁狂歌笑挽狂瀾倒熒熒半輪月驀奔  
丸丸幾點星欲裊望中咫尺函館灣但聞鼓角一聲曉  
須臾日出杲冰山四照紅霞繞知是五稜廓曠帶臥牛  
雪晶皎奇寒六月粟在肌黃沙大漠連荒堡短後之衣  
狐白裘想君意氣尙橫掃胡雛匹馬挾雕弧胡娘踏謠  
花窈窕擊筑新翻塞上歌想君悲歌壓燕趙吁嗟男兒  
成名不厭早豈徒憂愁以終老如君此舉亦何豪脚跟

直覺齊煙九點如豆小頻年海上紛騷擾內地愁霖麥  
苗稟廬屋蕩失田沮洳民無貧富皆餓殍安得上救黎  
庶飢下禦醜夷狡廟堂孽畫人不知轉勞萬乘憂心悄  
君不見翠華是日正西巡始信書生北征非草草嗚乎  
書生北征豈草草

拉鞍懸鶴峰飲台麓小香山樓又折簡招杉山三  
郊洗盞更酌盡醉極歡三郊詩先成卽次其韻

水一灣回竹一闌疏簾幽夢抵槐安凝脂泉滑宜雙浴  
潑黛峰攢忍獨看邀客塵談呼婢助洗杯箕坐解衣盤  
醉來翻覺香山小嘯破風篁六月寒

鶴峰亦有詩次韻

飄蕭散髮蛻塵寰髮髯高情魏晉間  
隔嶽翠微含澹蕩搖簾淨綠照孱顏  
齒牙冰煖蓴絲脆襟袖風涼扇影閒  
忽見前林烏四散泠泠梵唄出魚山

疊韻戲賦

雙鬢浴罷笑凭闌似解吟成字字安  
素足緣流疑月墮碧紗籠句隔煙看  
鮮妍如挂珊瑚網釘飯誰堆苜蓿盤  
愧我驚才猶欲鬪詩盟不許有星寒

算是煙霞水石寰無端著句應酬間  
四圍濃翠集缸面一縷沈香縈幔顏  
赤鯉魚聲荷葉動碧蜻蜓影釣絲閒

錦囊收得眼前景待我探奇金洞山

余將游香山偏探上毛諸勝

八月二十三日味爽發都率賦一律

落月低回夢幾醒今朝為客豈飄零  
計於問舍求田拙詩到模山範水靈  
紗帽官場雙眼白緇塵京國一衫青  
數峰相對寧無愧且趁東方尚杳冥

火輪車上口占

短笛一聲車便登玻窗猶閃隔宵鐙  
此游要向溫湯坐不怪奔輪氣已丞

飛鳥山前曉色開記曾沾酒小亭臺  
閒聽鐵路如雷響大醉掉頭轟飲來

王子驛

竹籬茅舍兩三家家繞一灣流水斜知有小娃來漱石

霧中香迸白蓮花戶田川上所見

八雲歌是定情吟神亦人間兒女心婚嫁滿村冰泮節

至今祠樹綠成陰大宮驛驛有冰川祠

平生魚疏與蟲箋自笑蕤頭不直錢一瞬經過方磊落

鴻巢熊谷又烏川

赤城霞照午晴初知距前橋僅里餘桑柘一林蠶事畢

火輪響更似縲車

前橋驛

環驛盡桑麻言停簿笨車畦分丁字水縣放午時衙南

陌羅敷媚西谿蘇幕遮觀魚亭下路野蝶隱疏花

一谿橋排船為梁柱

小女谿窗擲織梭中男沙岸跨牛過橋無梁處船如鵲

輕送京人也渡河

澀川驛訪堀口藍園老人貞歛留憩片時題壁而去

蕙帳秋生猿鶴羣柴門暮掃薜蘿雲當檐峰影遙相揖

將謂山靈即是君

出驛徒步入山

卯飲辭家燦曉星車三十里不曾停入山始試蹣蹣腳

踏到斜陽酒未醒

香山坐湯雜吟

記借邯鄲古枕頭七年前賦小仙游重來非夢仍非醒  
雲影羅羅十四樓

雙笛嘯雲樓下聞掃雲樓上水沈熏岫雲縈繞香雲鬢

第一銷魂是枕雲

岫雲香雲枕  
雲亦皆樓名

雞犬相攜住此間抱兒巖接丈夫山雙峰也學雙鴛浴  
倒浸溫湯洗曉鬢

山容澹抹不堪顰幾點青螺雨後勻走翠飛嵐旋一掃  
纖痕黛染卷簾人

行折秋花插膽瓶清晨照水影娉婷一枝供養醫王佛

病到相思泉未靈

幽蘭香漾一槽泉半臂還添鏡鑑前生怯驟寒吹易入  
不知雲是妬羅絲

雲來霧往散爲風非霧非雲天霧蒙誰信三層樓閣上  
人顏正照夕陽紅

煙藏古剎亂風鐘欲訪俳師物外蹤山鳥一聲還報夕  
仁泉亭下水淙淙

人愛鶻聲度夜分我言此物不堪聞也愁一片上山月  
照見歸心關屋雲

猿澤猿啼楓樹林離騷讀罷暗沈吟恰從高嶺聽呦鹿

樓有嘉賓夜鼓琴

萬木參天天蔚藍松風澗雨碧虛涵山層卻補嫦娥缺  
蘿影深藏玉兔庵

萬葉歌謠古語訛訛如掃葉不堪多卻憐紅葉館中妓  
齊唱香山新踏歌

游榛名山紀行七十二韻

鬢髻青窈窕誰識山有榛不游榛名山恐負彼美人我  
初到香嶺曦麗其明晨娟娟霧姿秀濯濯煙態新出沐  
冠一彈晞髮衣一振游意不可遏擔簦乃單身道旁見  
兒女挹泉黃染巾靈湯溢石罅奇煖含古春泉源不暇

問前途疑廣堙忽得兩條路躊躇迷梁津矯首望雙嶽  
決背凌煙旻左折未可測右轉何嶙峋松風灑峻阪前  
導鳴幽筠攀蘿氣已喘舉足還逡巡賈勇登絕巘羊腸  
緣齟齬險極倏開豁瀕洞無崖垠平原長榛莽蘚石斑  
磷磷纖路中縈紆花草秋橫陳蔥蒨鬱可愛青紫紅紛  
續晚香暮寒蝶幽叢栖野鶉東瞻相馬嶽疊翠亂不勻  
斗蠶此爲最洪鑪難鎔鈞云有將門像披髮猶怒瞋險  
惡詎可恃天亡自夷泯西面小芙蓉蓮岳稱等倫不見  
玲瓏雪亦結清淨因其下爲香湖一碧波瀟淪山意蓄  
古黛倒涵鏡面皺長風一鼓盪蘆漪搖小輪欵乃和韶

濩恍鳴山水，錚鬢梳如靜女。烏帽如佳賓，嫣然磨硯巖。  
賡答澹以親，靡空發長嘯。行行沿湖濬，叢生碧杜若。足  
共蘭蕙紉，或云此湖底。神蜈沈蠃輪，有滄時興雨雷電。  
相顛胸，又傳木家婦。魂魄嗟鬱湮，往往風雨夕。秋墳聚  
陰燐，迂誕無可信。荒唐恐非真，聊復從俗例。爲薦南磧  
蘋，去陟天神嶺。漸覺靈境臻，崇岡聳華表。唳鶴俛首馴，  
回觀湖杳然。水紋鋪繡茵，澄嵐欲浮動。衆岫呈微顰，留  
戀爲小憩。願卜煙霞鄰，此志何日遂。下徑踏遺薪，是時  
四闕寂。響泉獨潏潏，萬樹影森立。日午飢飈呻，覲面逢  
怪石。壁立劈澗屑，巘嵒幾千丈。可以壓波旬，更有鞍挂

巖天馬六轡，均安得。晡上馳籟雲，摘星辰。豁訝洞門拓，  
金碧熒琳珉。鐵鐙焰不滅，卽此祭岳神。松杉翳白日，參  
天同大椿。霜皮久剝落，磊砢而輪囷。出祠到村落，雞鳴  
犬亦狺。似有炊煙濃，多是無懷民。不然聖明世，豈容輕  
避秦。兒童笑擊壤，想見風俗淳。繫我懷山林，夢想曾勞  
頻。幸喜濟勝具，今日得一伸。幽探路旣盡，便沾濁醪醇。  
醉吟出林藪，斜景銜葳蕤。白雲起膚寸，其初若霏塵。須  
臾涌縷縷，旋現魚龍鱗。俄頃彌六合，飛雨驅波臣。紫索  
電一掣，眉睫鳴雷輪。屏氣暗太息，平素多艱辛。偶爾悅  
心目，復邁雲雷屯。人生自局促，天地終岑黃。憶哉古君

子枵腹慙經綸

雙嶽丞身窖放言

大冶磅礴無不能造化鑪內煙騰騰謾勞皇媧更搏土  
羣生煮作豆半升由來混沌本無竅彌縫一開乃可憎  
網疏巧免鼎鑊苦法寬復此饋餽丞我怪天公卻多事  
儘其狡獪其愚瞽賢姦況是性賦就爾許罪孽天自增  
如何究治苦羅織得非別有鬼物憑金丹鎔鍊人種子  
然後白日纔飛昇山靈聞之忽暴怒疾雷一吼不肯應  
嬰兒姘女相顧笑彭觥嶽腹仙胎凝么麼書生敢唐突  
似俗非俗僧非僧三鍼不牢甘速禍譬如飛蛾聚夜燈

豈知天機叵漏洩且下一火加戒懲夢中吟嚙詎足咎  
黃梁未熟殊垂矜但容哦詩飯顆上陳陳釘餽堆相仍  
玉皇有詔一聲勅放他自在爲蒼蠅

九月一日將出香山題寓樓壁

似有金支翠羽紛百靈湯沐氣氤氳無多清暇消長日  
不盡奇探惜落矐子晉玉笙緜嶺月謝女團扇敬亭雲  
再游肯望餐霞伴願許窮年麋鹿羣

雲鬢歷歷記逢迎依舊孱顏此送行眼底翠巒沈暮氣  
脚跟黃葉踏秋聲山人勸酒閒花落蠻婢提壺好鳥鳴  
旬日工夫拚一醉仙緣勝證石三生



題北條鷗所北游詩卷後

船來船往白鷗隨潮落潮生月不知北海別開新北里  
翠鬢爭唱北郎辭

書絕妙好詞箋後

并序

此本係德山樗堂舊藏每詞逐句施豆皆其親筆只  
箋註未句詞亦間有未經點讀者錯謬正多今一一  
補正又徧取諸家選本註記異同庶乎有以副其遺  
志云爾乃賦二十八字題後樗堂名純一號夢梅瘦  
仙越前人溫雅風流詩詞兼擅其長仕官司法省以  
命歷巡播備地方遽歿于倉敷客舍至今無不嗟惜

者

韻字紗窗鶯語空海棠花上露玲瓏詞皆黃絹人黃土  
朱暈平分淚暈紅

鞍懸鶴峰成親後僑居牛門余與鈴木晴峰訪之  
戲賦

十載京華一酒狂風塵爲吏更郎當偶因真率尋嘉會  
君道溫柔勝醉鄉盧婦雙栖秋燕影文簫四壁木犀香  
韻纔寫罷眉還畫只有銀毫似我忙

月夜卽事

幽窗頓覺夜寒生槭槭疏桐露滴聲儘被姪娥笑無趣

月中仍點讀書檠

同鶴峰晴峰飲牛門酒樓席上次鶴峰韻

驚鴻舞態現天魔飄颺裙翻血色羅夜月丸丸團扇影  
春鶯嚶嚶串珠歌才於暈碧裁紅減情向牆花路柳多  
縱把燈光十分照舊題塵暗可如何

鶴峰曾有誰把燈光十分照伯看壁上舊題痕之句故翻之

古中秋日陰雨淒寒至晚而晴月光倍覺皎潔

應有仙人跨素鸞浮霄雨洗碧漫漫露蟲聲碎明珠佩  
風桂香凝白玉盤但望中天光正滿誰知大地影逾寒  
關山一笛更悽絕莫在瓊樓高處看

題朝鮮人洪琴石英植書成三問夷齊廟詩後為鞍

懸鶴峰作

虜王麀怯下殿走宮門不見虎豹守譖譖出出天忽紅  
蛾賊在前火在後昔時麥秀今雞林可憐化作豺狼藪  
逃生皆學箕子狂殺身惟記臣洪某矢石雨下髮上衝  
恨無寸鐵誅羣兇手持王裾伏不起血流滿面還從容  
曰臣創重臣死矣身自此辭魂尙從丹心白日照青史  
傳聞亦掩傷心淚矧乃親觀書淋漓握拳透爪數行字  
吾友鶴峰一少年雄才卓躡自無前薇山愛誦伯夷傳  
蓬島笑拍洪崖肩一見論文已心折但覺鬚眉氣寒烈  
同將怨望咎夷齊固知肝膽非胡越書贈名臣詩一篇

想見當時腕屈鐵我今披此淚連絲題句本當無愧辭  
鴻毛一死萬萬古不比西山長苦飢所嗟釀禍豈甘露  
皇天無術庇王涯至今餘恨沁入紙髻聽颯颯悲風吹  
戲寄題小笠原楚崖公子長育何必讀書齋以齋名  
爲韻

拋書如有悟忽地笑呵呵祖龍焚後我欲奈死灰何  
訓詁動千言如盲探暗室畫蛇空爾爲刮膜亦何必  
壁間琴一張架上書盈軸惟有詩可絃無如畫堪讀  
祇以琴心故馬卿名不虛知逢傾國豔勝著等身書  
公子紫蘭佩佳人紅燕釵曲房凝夜燭閒卻讀書齋

志痛次韻鶴峰見慰

香縷空縈續命絲寒花淚滴佛前枝爺今一慟亦何益  
兒也重生應有期入夢便來緣不盡拜醫無語悔誰知  
瘦妻更撫靈牀哭如見彌留宛轉時

長鹽純卿以其先人忌日招同史館諸僚友賦此  
鳴謝時陰曆重陽前一日

佳節明朝更奈何只今楚些不成歌酒經痛飲俱餐菊  
詩有遺哀欲廢義秋後寒溫難遽定古來風雨此偏多  
我家正哭新魂小同是人倫恨未磨

鹽谷修卿

時敏

國分寺瓦硯欲賦一長古未成先書

此作引

恆河沙數一微塵何物能留歷劫因寺廢曾經金鑄佛  
瓦全猶自墨磨人秋生鴛羽滴殘雨霜剝蘚皮生凍鱗  
石火電光多少恨玉蟾啼眼至今新

妙巍山紀游詩八首

北邙草已宿南山石欲爛感此悲填膺長夜幾時日灰  
我丘壑情兼忘風塵歎泣守陰房鐙日夕獨悵惋翩翩  
笠公子風流儕輩冠云厭城市誼山水入幽玩疊巘青  
翠沈秋宜杖藜看楓意欲醉人壺盧鳥相喚勸我強攜  
手時正午衙散三十里外路往還一日半金洞闕瑤草

赤城蔚霞觀足使憂心甦望望笑齒粲

鐵車火作輪飄疾轉樞軸平楚疑回旋談笑隔川陸忽  
已離鴻巢忽已出熊谷武野忽已遙毛山忽已轟風非  
列子御地豈費仙縮衆正酒盈把我偏淚一掬記曾乘  
此車釋兒送匍匐今再乘此車家人弔影獨生滅理本  
然夢幻安可逐車輪如電馳不及人生速

暮投磯部驛鐙火出檜杉擡頭不辨色但見山巉巖靈  
湯卽此沐快如馬脫銜始笑束裝急未遑卸朝衫試挹  
泉一杓其味如潮鹹母乃太古海巨石摧檣帆今變桑  
麻田山猶疑鬼剗鑿空創奇說祕比窺琅函旣以磯部

名推究休詰誦此理或應有此語誠非凡

斜月隱檐際夢醒窗空明披衣起視夜遠雞時一鳴松  
影星闌干笕響泉縱橫同伴忽側枕謂是山雨聲予曰  
天尙早衆曰晴不晴所答非所問笑撤油盡檠銀瓶指  
點索取次行廚盛啜茶甜一甌飯黍香一甕出門露蛩  
歇隔林煙磬清初影在疏樾霜意鞋心生臨流偶翹足  
願濯滄浪纓羣岫翠新沐梳髮嫣然迎

正面妙巍山巍乎何突兀似崩崩未崩一峰一峰凸直  
欲刺天痛登者懼遭則陰厓啼鬼工萬古此巉峯右有  
淺間嶽煙縷上噴勃左爲金洞山峭削蒼見骨我欲翠

微巔靈楓現絳闕其間醉起舞摩穹若碑碣劈雲絮我  
衣翦霧結我韞笑秉蠟燭峰夜游列仙窟

有蝶色紺碧曬羽晨曦光捉之遽已失團影飄然颺可  
見蒙叟樂全在無何鄉田園乃歸歟此鄉不可望采菊  
女伴偕拾橡童子忙見人急相喚羅拜桑柘旁誠知聖  
代化德澤敷遐方自順帝之則何復希羲皇

入山不覺險翮其攝衣上洞口得華表自有驂鶴想石  
磴數十級丹崖幾千丈俯視魄忽奪始知來路仰四顧  
茫無邊白雲但漭漭脚跟疑踏空攫入巨靈掌山風冷  
然來諸天一鈴響沈思幻相滅心日乃爽朗松柏圍翠

壇神靈隱幽幌迴酌泉潺瑯當階默稽顙自茲路斗峭  
細徑覆榛莽谷坳不受日楓葉紅乍晃敲火燒乾柴溫  
酒遂真賞興極一浩歌萬木皆震盪

騰笑下山去石壁奔乾雷山靈欲破膽盍同傾一杯離  
山酒已醒極日重低回仙凡頃刻判漸覺風吹埃咫尺  
碓冰嶺此亦何崔嵬武尊昔東伐遺迹今蒿萊按劍夷  
可殲招魂姬不來天地鼓聲慘風雲空自哀嗟我所經  
處豈是望子臺臨風忽垂淚吾兒何在哉

合詠國分寺瓦硯春日杯二物皆鹽谷修卿所藏  
有瓦飄殘國分寺有杯流落春日山英雄如魔應劫出

豈有佛子慈悲顏殺聲撼地天慘澹若人一身渾是膽  
舉鞭叱咤渡犀川食肉昂藏思燕頤胡爲禿髮學優婆  
居然鐵甲一頭陀馬蹄血等大海水劍鋒勢壓阿修羅  
龍蛇旗動罷酣戰歸來又張凱歌醺一杯一杯千百杯  
頃刻杯乾如掣電電馳水逝嗟興亡可憐一夜星無芒  
長期越山屹不動誰知秋人行營霜萬古風雲有消歇  
時來運去不可掇卽如金碧之伽藍亦爲灰散爲煙滅  
謾怪名將歸浮屠泡影毫髮無差殊寺壞瓦猶堪作硯  
人死骨空蕘斷蕪老友修卿夙關佛猶磨瓦硯色蒼鬱  
英雄身外留一杯招魂願醉忘憂物齋頭置酒雙傳觀

硯紋鱗纈杯心團淋浪濡筆索題句酒痕墨暈相斑爛  
我亦不說佛家理我亦不灑英雄淚請磨此硯飲此杯  
醉書過雁數行字

題夢樓主人畫梅次其冬曉卽事詩韻

琴三弄罷笛雙吹譜到無聲忽入詩澹墨一屏香又暗  
夜梅欲語月來時

春自南枝到北枝山中林下水邊籬爭如寫入生綃好  
一幅橫斜萬首詩

歲暮漫興

嚴霜飛烈烈歲暮亦何寒霰雪天心遠風雲相業難苟

令九鼎重豈惜一鐘殘矧又麟臺畫容人再拜看

回天賴誰力閭閻鬱難開僵桃憐李代飛燕免鷹猜坐  
使台星變非關蠟淚堆臣心何以見無地起樓臺

皇猷日以壯豈必祖宗遵制古諸侯爵銜新內大臣宣  
麻裁鳳詔尙寶侍楓宸恩遇殊優渥天何負若人

國步昔多難卽今心暗傷寒輦動征戍苦月照逃亡門  
第輕王謝朝廷重薩長七卿夢相語當日太倉皇

身一人奴耳遭逢有是云我朝豐太閤漢代衛將軍邊  
塞戈鋌集英雄割據紛而今泰平世猶自際風雲

髀肉摩挲罷蕭蕭聽馬鳴急流誰勇退走狗豈甘烹雖

有君臣合難教水火并何人膺重任鼎鼐試和羹  
隻手江淮障孤臣涕泗滂城撐邊月黑刀割陣雲黃笳  
鼓三軍震風沙百戰場功成枯萬骨銷甲話農桑  
王師建瓴下羽檄忽縱橫北海孤軍陷東都大廈傾水  
寒飲馬窟月墮受降城昨得邊鴻信弔魂吞哭聲  
赫赫中興業卿雲光四敷廟謨須遠大黨禍正虛無言  
者誠何罪詩人未必迂君王吁咈久百辟敢都俞  
雪花飛忽大如掌落翩翩攬彼風塵物投之豺虎前山  
河霽相照日月皎雙懸鏡吹春聲發吾心始釋然  
槐南集卷六

槐南集卷七

東京 森大來 公秦

丙戌

元日詰朝有作

銅壺漏滴候雞鳴闕下千官劍佩清已許趨朝驂寶馬  
未妨上壽御銀鐙曠咨海內玉音重申飭宮中珍費輕  
春及臣家梅笑處霑醪遙拜鳳凰城  
蘆簾初曉薄煙遮城裏春風已幾家汲井瓶寒栖月影  
聽鶯院小夢梅花內人澹試紅脂筆鄰女嬌憐翠袖紗  
漸覺翩翩紈袴子踏歌西陌鬧南斜



又

天聰運鳳鈞賢哲演龍綸自此麒麟援無非草莽臣中  
台星小坼上苑柳初勻巖處春暉動平分雨露新

一月三日奠亡兒墓

獨折梅花供墓門新正三日祭殤魂乳纔解索神初慧  
口不能啼病亦冤每與汝娘悲繡襖空教乃祖坐春軒  
無端屈指恰周歲二月生辰那忍言

春初雜述

似道官場傀儡登人心天意兩無憑微黃新月金星犯  
乍白寒梅木雨冰行路有誰憐棄婦在家多半是閒僧

高樓歌徹簾重處不放春風到下層

兒女如花大道邊烏衣子弟亦翩翩袖寒謾折章臺柳  
歌冷誰尋相府蓮燭淚零星賓館裏鶯簧斷絕妓門前  
縱然吹得春風到似此春風轉可憐

浣紗谿近古星岡分得御溝春水長畢竟鶯花連禁苑  
依稀眉黛似宮妝繡鴛被在空疑夢換馬歌殘忽斷腸  
來去香輪看不見赤門新柳正嬌黃

一月三十日孝明天皇忌辰恭賦一章是日大雪

誰向東郊試繡鞵彤雲黯慘更如何楚宮罷奏幽蘭曲  
梁苑俄傳薤露歌

先一日葬故一品有柄川親王詔停京中歌舞

春入山陵青草淺風吹

松檟素衣多至尊興念淚如霰忍問先朝頭白娥

哀緬旬詞

運去滇南白日煙瘴雲黃處古朱波緬甸古朱波國也覆車今日悲

無益呪水當年毒更多明桂王事殊域幽魂空欲斷前朝恨血

不應磨興亡宛似青城恨可有遺民一曲歌

傾盡銅盤鉛淚斜降王嗚咽上旃車包羞銜得青衣壁

遺恨薤成白骨沙宮闕花開聞怨宇荆榛月墮有哀笳

可憐一夜山河改夢尙低迷覓故家

宣慰司存部落荒禾邦蠻暮總淒涼禾邦蠻暮并緬甸名胡蘆鐵印龍

湫變緬甸五嶺印其文云法龍欲降禾邦蠻暮緬甸語謂大小等之長也渾覺金書貝葉亡乾隆時征緬甸猛拱土司渾覺獻貝葉書一卷吳梅村詩貝葉

金書使者朝

已是英蘭新屬國誰知天水舊封疆緬甸宋寧宗時始通漢土依然

阿瓦城頭月頭白烏啼夜半霜

野哭無人有斷煙黑山門下羽書傳輿圖并入三天竺

旗幟新頒大邈顛誰向烏蠻思建柱我猶白面愛談邊

長風逆卷西歐水記粵南亡是去年

先妣忌日

疏梅修竹影參差中有無窮風木悲夜雨幽齋悽掩卷

春陰空樹泣聞絲故家衰草寒煙合先隴啼鳥落月知

猶夢依依騎款段此心孤負已多時

剛腸篇贈野上寓公瀨三

百鍊之剛不可折一杯之酒乃能熱人間那得如此腸  
獨有梅花心似鐵梅花香暗春濛濛淺水無聲曲徑通  
吟從驢背覓知己笑向花間逢寓公自言本是播中客  
占斷須磨與明石舞兒灣月姬路雲此鄉長署醉侯伯  
不善飲者非吾徒惟同醉者皆如愚淋漓罵盡仲孺坐  
窈窕問徧文君壚一自掉頭去故里京塵潦倒今如此  
栖依雲弟洛陽城眠過白也長安市東風榆莢吹錢忙  
頃刻揮空無底囊從來不許窮愁滿贏得彭亨一酒腸  
此腸能剛柔不如亦容千斗酒不吐遮莫風霜磨折人  
天真堪共梅花語我亦痛飲愛讀騷詩腸一寸愁根牢

愧君酒量大於膽剛哉腸也何其豪百罰不辭多意氣  
一生休灑黃金淚碧壺傾倒花橫斜翠袖輕扶竹亦醉  
寓公爾乃酒英雄自有觥船不負公謾道浮生如逆旅  
寄居誰不可憐蟲寓公更酌梅花盞廣平一賦辭尙緩  
請聽我唱剛腸篇敲破關西鐵綽板

送西尾鹿峰

爲忠

罷職歸西京

伊人愛展豳風圖聲名特達金閨趨遭逢不負君子儒  
更兼黑妙鍾王俱一枝健筆傳楷模四壁笙磬歌韶虞  
鸞之鶴之硯潑墨堯典舜典書注朱卽今歸去胡爲乎  
熏衣香冷直廬曉夢見故都花滿道忽憶東山舊草堂

羣鶯啼亂江南草伊人逸興飄乎仙凌虛嘯傲嵐翠前  
風鐘幽隔縹緲巔花簾微卷空濛煙第三橋下春水船  
第一樓頭櫻筍筵知君枕經薛史外膏肓渾被泉石纏  
卽今歸去亦偶然我姑酌彼金鑿落願君爲一奏幽籥  
胸襟君自如清風我詩豈比吉甫作

讀宇都木烈士遺草悲感交集因有慨乎時

昔在足利季亂民唱德政當時王室微威特將軍柄天  
地悲兵戈文武事干請甲第擁重資奴僕更豪橫孤寡  
見凌辱誅求及衰病慘禍不可量竿旗激百姓一自江  
都開霸基二百年後民大飢路旁啼者瘦見骨烏鳶啄

肉無完屍高牙大纛袖手坐竊鈴掩耳當面欺不聞曾  
糶太倉米偷安正類室町時浪華城上烽煙起洵呼反  
賊大鹽氏渠亦義憤之所鍾德政遺風乃到此以暴易  
暴如沙蟲尤而效者非英雄可歎孤負聖賢學九泉屈  
煞姚江公大義可滅親臣子弗可叛大恩可報師王法  
弗可亂堂堂宇烈士從容叩馬諫元精耿耿光射人一  
叱欲教白刃散帳下流血紅糝糊嗚乎烈士終殉難遺  
老猶談天保年飛灰瀕洞崑岡煙賴將一卷判玉石焚  
餘詩草長留傳我今披册忍竟讀爲君願傲西臺哭暗  
風吹紙飄血痕朱鳥欲來魂躑躅時清海內銷干戈五

風十雨相調和重華親政四門闢南熏合奏卿雲歌僉  
望王業益宏大誰知士氣漸折磨書生掉舌動煽亂蝸  
蟾鼎沸皆么麼悲夫黔首見蠱惑致使無辜罹禍羅君  
不見去年浪華黨人縛紛紛逆案何其多嗟嗟逆案何  
其多烈士云亡可奈何

國重牛山大令

正文

招同家大人及小野湖山中井

敬所二老飲湖畔酒樓比余陪席醺已闌矣有妓

小仙侑酒善談四坐傾靡興極成詩

白髮紅裙大小仙同隨刺史醉當筵夜簾無月影搖燭  
春院有花香隔煙笑與玉人相見處悔非綺語未刪前

阿儂不是司空慣肯道青衫最少年

芳野懷古

荒溝古水遶陵園半夜南朝月一痕仙竟無聲銅亦淚  
佛雖有恨石何言野塘花濺勤王血霜瓦烏傷返闕魂  
復壁幾曾青史上編年空自紀延元

三月三日鈴木晴峰初度招飲賦此致謝是日風  
雪頗甚

茂林修竹會羣賓都是灞橋驢背人香雪梅初新上巳  
峭風鶯後古生辰撲闌飛絮疑蝴蝶儷曲幽蘭憶洧溱  
觴詠不辭花正笑醉歸宛似舞雩春

北條鷗所將游清國北京乃泛詠燕都形勝繫以  
近事贈別四首

刀兵劫換幾滄桑不改金元古帝鄉洗象河陰春柳碧  
晾鷹臺北朔雲黃筑聲燕市歌應壯雁影秦城路更長  
何代園陵還宿草居庸積翠照斜陽

瀋陽王氣一何雄繡嶺風雲指顧空紫塞歌殘雀翎白  
朱家運盡賊巾紅忽傳動地銅笳角猶見連天玉蠅螬  
劫後昆明灰不死傷心重此說咸豐

謾言天險倚崇墉亭堠虛傳海外烽北狩辱銜英吉利  
西來禍烈阿芙蓉近聞閩水更沈載誰與雞林勞折衝

爲道東瞰光赫赫地無兵甲有春農

知出扶桑第幾程珊瑚赤射海霞明翻來覓藥求仙案  
例去乘風破浪行鮫女贈綃將霧翦馮夷擊鼓共鼉迎  
箇儂自笑真多事獨在塵寰賦北京

二十日同晴峰鶴峰散策東台晚飲酣春亭以亭  
名爲韻歷敘所見

朱闌今朽古迦藍六六房空取次探一鳥不鳴台德院  
孤花閒放大師龕銅鐙丹綠苔文剝畫壁青紅鬼髮鬢  
試問游人尋到否多隨士女看春酣

少姬煎茗笑留賓竹外綠煙縈髻新草樹晴呼畫眉鳥

苔泉淨照進香人鈴聲塔近知雲遞裙影花飛訝蝶眞  
使我留連不能去將軍祠畔夕陽春

盡道神容儼有靈可憐大樹已飄零惟今花未經風雨  
終古春宜半醉醒忽漫傷心金殿碧偶然照眼酒旗青  
霑醺笑揭疏簾處剛是黃昏月滿亭

東台觀花偶興三首用酣春亭詩韻似永阪石埭  
豔煞才人語出藍金仙坐下句重探恐被茶煙扶上榻  
笑拈花影乞同龕染衫香雨生紅暈擁髻春鐙泥碧鬢  
自今長學閒鶯燕眷屬情天夢共酣  
留戀容儂一宿賓霧中鬢色曉來新卸妝似恨前宵雨

嘆黛仍憐絕代人有妓誰供行酒用無錢方覺買花眞  
比他安石風流甚獨爲東山賦冶春

臨風開謝覺花靈忽笑嫣然忽淚零天下癡心人便好  
醉中奇語世堪醒老鶯隔葉陰陰綠小草薶香鬱鬱青  
春去春來一杯酒夕陽并餞短長亭

墨上看花作十絕句

拚把春魂醉裏銷翠裙紅屐一般嬌渡江要看花眞色  
不信吾妻是假橋

早櫻風緊落誰家命與紅顏薄似紗乍訝被雲遮得住  
二分春色八重花

小橋如枕臥春江曉起何人送畫艫一櫂筑波山翠破  
欲搖鬢影去成雙

踏到飛花土亦春美人鞋底草如茵風前大有憐香意  
不放鈿車輾作塵

崔護門頭記不真漁郎今日又迷津重來應悔尋君飲  
別有桃花似酒人

訪伊藤聽秋  
已移家去矣

花下煎茶倩玉纖不知闌角水初添篆痕竹氣漏聲午  
一片輕陰生翠簾

古渡春風水拍村村姑鬢上野花繁王孫如問無名草  
不似閒鷗不肯言

四顧樓空花影橫門前新水夕陽明可憐仍舊鵝黃柳  
重嫁才人最有情

開關根癡堂倚寓四顧  
皆花樓樓柳北故宅

酒痕吹上少年襟著屐春泥香較深都是鶯花熏染徧  
梅兒墳草亦紅心

踏青士女一羣鶯亂煞啼花萬種聲忽地淒迷煙雨裏  
不知是夢是春醒

五月一日每日新聞社有移局改張之舉索余題  
句

闌發幽光徧四寰價廉寒士更歡顏定知手有如椽筆  
架出胸中屋萬間



英米清韓獨佛俄事無遠近畢搜羅近來翻得攘夷案  
不共櫻門血影磨

讀書東山雨後春落紅新綠匠心勻是誰痼疾能如此  
吾愛煙霞一散人

筆陣酣開英俊場珍珠小字粲生光婆心照出人情薄  
醒世還須紙半張

題山下生龜吉陪游詩卷後

山下生三島中洲先輩入室弟子頃陪其師游千葉  
縣下梅花村莊凡半旬得詩若干首請余刪定故有  
此作

伴得仙師促道裝寒流石上笑褰裳提壺小鳥啼郊外  
拾翠幽人愛夕陽春樹綠圍千葉縣夜梅香古一花莊  
憐君清瘦詩標格弟子韓門獨擅場

南北兩都篇并序

丙戌五月佐佐木掌記凌蒙逸書采訪之命出使五  
畿及江州地方掌記在史局纂輯南朝史料又尤熟  
精室町掌故故專詠南北兩都贈別

叡嶽噴岫壓畿甸紅牆綠樹參差見芳草尋春北野宮  
古鵲啼雨東山殿御溝新水鳴涓涓流出上林花一片  
花片猶經風雨愁人生便閱滄桑變參天喬木已灰塵

瞥眼繁華如露電平蕪落日風蕭條今是耕田昔耕戰  
陌上銅駝恨未銷天中金閣尙岌巖苑將軍纔棗矢  
鴨河亭榭早聞簫侯門甲第亦歌舞七頭三管何逍遙  
他日倉皇烏鬼哭當時躑躅紫騮驕蕭牆遽釀應仁禍  
典籍難防烈炬焦幕事失傳乃如此不堪回首說南朝  
南朝宮闕一抔土行人淚灑離離黍翠華髣髴隱香壇  
碧寺淒涼傳粥鼓如意誰期轉法輪傷心曾奏淋鈴雨  
玉魚有恨吹青燐鐵鳳無聲竄蒼鼠留與山僧導客過  
除非翁仲向誰語肯搜軼事到長慶知君彷徨幾延佇  
君也翩翩良史才聲名館閣衆爭推玉堂祕本資抄撮

壞壁殘編供翦裁喜君采訪徧京邑不須堙沒嗟蒿萊  
想君褰裳渡琶水比叡空翠遙飛來山溫水麗看仍舊  
銷南沈北忽生哀忍教皇統分正閏臨岐使我歌徘徊  
五月三十日文部大臣森公有禮招致都下名流爲  
其尊人鶴陰先生八秩壽大來與家君亦陪席末  
謹賦七律二章奉賀

鬪健先登百尺樓嶽蓮如揖白雲浮中天鳧影飄雙鷁  
南極星光照十洲小夢或游仙洞府大年不記鶴春秋  
笙聲恍在緱山頂吹入觴霞灑灑流

萬里桐花鳳語清朝天佩玦更鏗錚浮槎星渚淺深水

停節華旗佳麗城圭壁東西供上壽衣冠內外重同盟  
鯁生敢玷諸宗後扶掖家翁拜蔭榮

雨中曼陀道人夢樓招飲

滿簾涼綠不勝鉤燕子銜泥乍欲愁何處宜聽花後雨  
君家元有夢中樓微醺暈檢酒雙袖星煖香留春一篝  
似道閒情總無緒柳絲搭在曲闌頭

六月十六日

空帷只見篆煙殘灰不重然燭亦乾夢裏短晨零露逼  
人間大暮斷鐘寒疑回倦枕剛含笑翻向靈牀錯勸餐  
生死交加翁壻淚可憐痛定獨洩瀾

夏事八詠戲賦

縑絲

初三月子三五圓夜夜蠶眠儂不眠素絲欲吐獨繭苦  
他生誓中寡女絃青紅碧綠誰所挹繡出鴛鴦錦幾襲  
雙栖更被同功絲翻忘當初釜中泣縑車雨驟風鬢涼  
大婦中婦皆澹妝可憐少婦獨無語銀箏搗破羅敷桑  
曬藥

玉兔揮杵桂花落擣作蟾蜍一丸藥佈散下界醫相思  
癡雲駭雨細商酌我今曬之如曝書忽覺滿腹春愁祛  
從前枉下兒女淚暈零星處同蠹魚青天碧海空傷別

幾人心鏡皎于月彼杲杲者生白東扶桑一片紅霞熱  
造醬

開門七件膳夫進癡蠅飛繞廚娘鬢相謔笑罵顏潮紅  
揭起布裙香一陣樂府誰翻昔昔鹽前身紅豆梅同醢  
覆瓿詩成食指動不如被酒游黑甜酒有葡萄醬芍藥  
寧知賦課到糟粕輸與一點桃花酸官家不稅阿儂醋  
賣冰

赤帝煮人肉糜爛幕天張出炎塵幔大地皆墮浩劫中  
姑射仙人亦流汗雪膚一滴凝爲冰卻笑人間市價騰  
北海爲開五稜廓晶芒八面山峻嶒蝶夢午醒倦不起

瓊漿滿盤嫵溢齒教儂竟體頓清涼無奈歡心澹如水  
插秧

江北江南聽啼鳩高田低田水泱泱新樹雨晴煙在蓑  
笠檐斜把夕陽揭東家三妹裙浣泥西鄰二郎面不顰  
心苗自是有情種休將露水笑夫妻如今黃梅雨已足  
行看滿地秧針綠爲兒完縫祭時衣教他學唱報神曲  
洗竹

篆絲無力糯紗虛雨過苔髮縈碧梳一庭煙綠濃可愛  
此君風度惟宜疏清風吹袖翠初翦露珠似有湘娥泣  
幾時消瘦空谷人虛心還怯暮寒淺細瓊纖粉空娟娟

不受人間兒女憐  
黃昏扶影濯新月  
身無膏沐飄乎仙  
浮瓜

秦時明月青門秋  
不知流落東陵侯  
侯家煙沒蔓草冷  
已覺浮生同水漚  
漢家綠沈記西苑  
風殿酒醒簾半卷  
金刀欲剖瓠犀涼  
井華忽迸轆轤轉  
轉盼繁華感逝川  
及時行樂亦徒然  
從今願爲情顛倒  
休負盈盈碧玉年  
折荷

錦石清江鬢影麗  
木蘭舟上微流睇  
四無人語有鴛鴦  
照水芙蓉正竝蒂  
櫂歌聲出吳王宮  
雙槳盪破魚西東  
忽憶葦蘿浣紗處  
無端褪盡羅裙紅  
折荷折荷絲不絕

寸心更苦柔腸割  
眞成誰是拗花人  
五湖煙水渺空闊

思詩

午夢還嫌作蝶忙  
醒來好炷一鑪香  
思詩終屬閒中累  
鎮日冥冥坐笛牀

夜涼所見

南院箏聲北院歌  
中庭夜色欲秋多  
銀牆西角星流去  
知有微涼漾絳河

納涼詞

團扇搖搖人散遲  
藕花香處水生漪  
秋聲已入蘋洲譜  
月白漁船笛一枝

晚間驟雨

颯然飛雨灑橫塘  
迸散荷花一陣香  
風定垂楊比前碧  
亂蟬搖曳萬絲涼

湖上次韻

雨過池塘綠驟加  
好移漁艇占鷗沙  
更須權入荷花去  
風有清香露有華

岐阜弔鐙歌爲勅使河原鐵瓦直作

豆棚秋入蟲喧坐  
挑出檐間鐙一箇  
熒熒似鑑古興亡  
破鏡山前月半破  
想見織公開府時  
北斗闌干雲壓旗  
鄰敵頭顱金錯落  
侍兒絃索淨瑠璃  
羣雄割據幾鏖戰

不及此公鎮畿甸  
席卷江濃轉瞬間  
掃清播備勢如電  
眼前突兀金峰攢  
藍河一碧生微瀾  
何須更復城安土  
由來風水似平安  
平安半夜嗟鼎沸  
倉皇變起本能寺  
可憐氣燄倏灰銷  
寧知一鐙照天地  
我昔讀書木葉庵  
清磬無聲月印潭  
盤桓獨有鐵瓦子  
往往翦鐙中夜談  
不料匠心運冥想  
鳳腦龍膏相燭晃  
劉骨玲瓏織縷工  
行宮邀得至尊賞  
祇今率土銷甲兵  
奇工轉使西人驚  
此鐙光徧太平海  
乃與聖代揚文明  
幾人回首織家壘  
但見衰燐青不死  
烏鬼篝火空零星  
滅明三十六灣水  
謝杉山三郊送牽牛花

東山月吐五更影  
轆轤咿啞轉桐井  
涼苑虛庭鐙半明  
羅幘人夢正微醒  
籬落露小風淒淒  
一蜚斷續星欲低  
如聞織女機中響  
恰傍牽牛花畔啼  
牽牛花瘦扶初展  
背人如怨仍流眇  
恍是銀河絡角時  
古歡幽阻水清淺  
故人家住東山椒  
起早爲憐花寂寥  
臨風凝佇不得語  
中含無限秋蕭蕭  
江郎不賦仙家別  
銷魂端合與儂說  
感君投我同瓊瑤  
碧者如紗白如雪  
我家茉莉元更香  
鬢霧橫陳嬌半牀  
自今宜夜又宜曉  
不容渠復思紅牆

秋閨

剛過雙星七夕期  
生憎蟲語逼羅帷  
儂家端乞蜘蛛巧

絡緯何曾織一絲

蝴蝶蜻蜓便面

蝴蝶蘧蘧午夢牀  
蜻蜓偷眼笑渠忙  
釣絲三尺閒真好  
不信嚴陵本姓莊

秋夜感興八首

暗笛西風滿洛陽  
擣衣門巷總淒涼  
幾家烏夜啼將半  
一度星宵夢不長  
團扇班姬歌裂素  
篝鐙中婦織流黃  
宜秋獨有幽人屋  
月浸書帷蚤語牀

風人一往覺情深  
秋蟋春鷓取次吟  
大塊文章無複筆  
離騷蘭蕙有同心  
曲終幽韻遠于水  
月出清光流到襟

若問自家身分小海棠紅瘦伏廊陰

偶爾興歎燈火前不談時局閱陳編幽花隋苑青燕國  
冷月秦城白骨田灑淚幾番傷亂世關心一事憶籌邊  
海門昨夜靈胥怒休使風濤忽撼天

砥柱何人挽倒瀾劫棊無局可旁觀中山雨斷桃榔暗  
平壤秋高筆策寒瘴海沈冥潛鰲出朔天颯爽俊雕盤  
夜深更數歐西事慷慨聞雞按劍看

巴黎宮闕凱旋門金碧巍峨尙儼存傲儻龍駒餘霸氣  
啁啾燕子啄王孫豈無志士寒心去應許詩人冷眼論  
惜爾共和偏失計吞清波浪已掀翻

國華英發有餘芬調理端憑舊相勳絕島鼉頭撐獨立  
一家鼎足限三分銀蟾夜豔晶宮水雌蜺朝臨絳闕雲  
咫尺回頭愛蘭土秋風燕麥動斜曛

故國煙塵絕慘悽魯連東蹈海雲迷終教窮士吹簫乞  
不及良禽擇木栖鵬賦千秋堪自弔雁書今日有誰題  
憐君長學蘇卿節孤島無人且牧羝

人心行路儘悠悠涉趣園林可自由風定蟬腔時小歇  
星疏露脚忽斜流漏聲敲玉丁丁滴詩思如絲乙乙抽  
幾度沈吟還一笑不知殘月下西樓

新花月誌題辭



東洛風流果不虛閒情休教酒杯疏春秋粉墨新花月  
船舫珍珠古畫書筆奪豔陳波匿市宇疑奇叩太玄居  
自今如練澄江水無復旗亭說柳漁  
香國羅天接迹昇華嚴法界本虛憑畫樓梅柳添妍翠  
繡譜鴛鴦翦綺綾墨客墨花翻墨水金春金粉壓金陵  
無端見獵還心喜我是情禪悟後僧

觀西人查理禰馬伎

鐘鳴七下鈴一掣笛聲角聲鼓聲迭鼓聲漸急角悠揚  
角聲欲高笛嗚咽忽地響合紅幕開看者屏息仍疑猜  
有騎者八轡十六四男四女徐控來女十五六嬌裝束

明璫翠羽照紅燭恍是瑤臺月下仙輕驂碧鸞跨黃鵠  
男亦翩翩美少年從容沃若相回旋宛是長安狹斜裏  
五陵公子鐵連錢相看一笑姝且秀態似春雲初出岫  
似卷非卷舒非舒平地旋風起何驟突有一騎如游龍  
奔趨騰擲風雲空誰其乘者查理禰紫髯爽顧眄雄  
舉鞭叱咤八馬靡挺身直入八馬避馬只見鞭不見人  
人亦不知馬在地整整斜斜馳一場男男女女排兩行  
俄然滾作一團影人馬滅沒天玄黃馬也長鳴奮朱鬣  
鐵蹄千軍摧躓蹀人也揮鞭如舞刀狹巷短兵急相接  
蹴散千林之亂鴉吹翻萬片之落花飄颻一隊之蝴蝶

蜿蜒十丈之長蛇休誇回紇奔虹赤豈數開元照夜白  
尤是變幻須臾間不離不即中節拍髯騎屹立呼聯班  
八馬不動如泰山馬上依然八男女汗無微點齊破顏  
送同僚鞍懸鶴峰轉營林主事赴任石川縣

男兒唾手思功名宦游一劍飄然輕讀書若箇居上第  
識字適堪憂半生蹉跎易負青雲意遭遇便銷英邁氣  
惟君倜儻快少年低眉折腰非我事一日看盡長安花  
三年笑留越女家投書相府奮朱管題句旗亭籠碧紗  
我亦愛霑燕市酒無事載尊問犀首終古難忘同調人  
矧今忍折送行柳柳絲長短疏蟬愁班馬蕭蕭入賀州

縣齋煙閉石川暮藩邸烏啼金澤秋落葉如聞直廬雨

只應回首望京土無端還憶餞飲時故人一一從頭數

青山巖谷突兀文氣盤勺水日下潮野田中生波瀾晴峰鈴木畫

筆美人黛猗堂秋葉襟宇君子蘭文質彬彬推俊彥并君

不愧史官選獨我承乏嗟疏才猶然擬續英雄傳講到

當時帷幄籌停毫往往苦冥搜就中難是越登賀三州

志乘尤荒謬卽是臨分重舉盞囑君到日訪遺簡焚餘

骨白舊城墟苔裏字蒼古碑版摩挲鉤索休辭煩我日

待音城北門因君博涉旁徵力願與羣僚細討論

家大人留別之什一時和者至十數家爰亦依韻

賦九絕句非肯騁北山之望聊以效西子之顰云  
爾

爲絮爲萍計本微吳江楓冷客心違而今疏盡月中柳  
搖落秋風烏又飛

氣元碧海掣鯨豪醉倚柁樓笑擘螯蒼秀岳蓮天半影  
月明如雪臥銀濤

紅豆又銷南國魂歌頭水調好新翻夜船吹笛疏篷冷  
燈火瀟瀟雨一村

猿哀灘瀨灘頭樹雁冷空船峽口雲一卷竹枝神縹緲  
石帆亭後有家君

京中香火詫神奇何況海南親見之月黑魚龍望闕拜  
金鐙遙赴水天祠

竹書汲冢博搜勤忍使堯囚付逸文被髮大荒魂夜下  
煩冤猶鬱讚山雲

淡島煙消不斷青輕舟一葉任飄零晚來撐出由良峽  
驗定天心北斗星

吳鉤談笑絕無惊獨有看山心未慵秋水長天忽然紫  
日華鮮照劍芙蓉

問舍求田休笑迂谿山已被柳州愚誰將水月鏡花手  
撈出海中如意珠

題南部煙花畫冊

同心一幅寫幽情絕代紅顏笑奉觥白髮風騷王伯穀  
不應薄命是書生馬湘蘭

輕煙澹粉幾銷沈家國何關兒女心偏與南朝傳恨事  
樵生樂府道人琴卞玉京

相思紅豆誤卿卿謾道蛾眉是愛名妾死尙書更遺臭  
當時悔不替郎生柳如是

痛絕朱門歌舞叢桃花獨自笑春風旁人爭豔儂顏色  
肯與春燈一樣紅李香君

次鞍懸季敏養老山詩韻養老十餘年前舊游之

地臨楮回憶令人神觀飛越

一樓千歲屹摩天豆馬寸人紛現前腳下潺湲菊花水  
灑來黃徧好谿田

林樾疏鐘響四天夕陽紅到寺門前焚香曾有同龕約  
偕隱何時此買田

小住尤佳兜率天僧雛導我十年前祇今成大留君坐  
也合衣披古水田

一道銀河落九天千秋長挂翠屏前回望還是桑名海  
笑問如今幾度田

古重陽夕懷舊有賦

歌哭何茫茫風塵四五歲歲逢重陽每爲飲酒計或  
趁冠裳會佩萸代蘭蕙或躡蠟屐游西山爽朝霽或當  
風雨時正逢苦吟際債難阻潘興糕豈準劉例時脫參  
軍帽未賈牛山涕乃今胡不樂如川者忽逝去年哭兒  
後菊花伏幽砌風吹秋蝶衣衰黃墜露瘞存歿從口號  
絆鞅笑心繫瞻彼盤空雕橫秋氣勁厲神州莽空闊雲  
物供睥睨河嶽青濛濛城市夕陽麗人生尙曠達銜杯  
燭更繼不聞彭澤翁柴門鎖日閉何學庸庸流徒嗟促  
促世此意無人知沈思耽孤詣一鐙照衣桁寒螿咽堂  
裔

西郊紀游詩

殘月隱蓬戶寒花浸苔井門有側帽客墮作飄蕭影吾  
友號青山排闥露其頂游意何突兀我眠未醒蒼茫  
河鼓沈顛倒衣裳冷鐘杵飄前林仍是杳冥境東方忽  
已白抗策撥煙景

蕭晨何豁然蒼樹出煙背熹微所照處遙巒媚秋態楓  
錦舒微紅霞綺間雕績一碧茗谿水似蓄翠匳黛嚶嚶  
鳥求友先我喚前埭爰會十餘人三五各爲隊牛門書  
屋中潮野草堂內一笑來何遲出郭宜爽味相顧共翹  
足振衣起者再人家扉始開竹籬一犬吠

小兒拍銅斗忽唱大隄曲大隄盛歌舞三更聽絲竹烏  
啼驛橋樹夜伴新人宿不知蕩子家還有舊人哭是誰  
非有情定慕顏如玉冶葉與倡條書中不堪讀嗟我何  
所思所思在空谷美人兮美人可憐依草木

十二叢下路一叢幽一叢苔縈古于篆纖徑秋花通修  
樹四圍綠疑被蘿煙蒙鬚眉亦欲染衣履霑濛濛皎見  
鏡潭匯微皺蘋末風風行忽無迹水定天逾空一亭葦  
爲簾紋縠生巖櫺拍手快呼酒紛聚游鱗紅客有導我  
者更撥荆榛中斷沒慶長碑牛角嗟磨礪沸水聽潺湲  
惟此萬古同

林勢緣坡陀平野莽莽赴田脈分畦畛線流渺回注遙  
睇心頓開神清逞捷步轉眄失同伴笑聲隱煙樹我俱  
二三子別取一條路斷約橫獨木墜葉響雙屨臯陰日  
昏暎奇矚往來屢欲問隔林友可有許興趣君子重通  
變文章妙錯互避熟關生境此理庶可悟公等非碌碌  
誰謂我途誤

琳宮敞空際瑤圖粲五色祇樹度微磐莊嚴不可測香  
煙凝紫氲似有絳霞艷壁繪嵌青紅龕鐙照幽黑吾聞  
佛慈悲徧度衆生惑華嚴一彈指寶塔涌淨域此亦大  
方便一切歸寂默端坐青蓮花土木豈窮極卽如我蓮

祖妙義準遺則一部法華經廣舌演功德救苦恆河沙  
無量百千億五字爲長城念彼觀音力奈何衣鉢徒此  
理參不得僅用夸愚氓金碧事雕飾感此發長嘅低回  
石獅側當頭一鈴吼猛震娑婆國

亭午塔影正烏勸提壺虛佇聽齋時鼓暫借農家廚友

有荀鳴鶴

謂日下子樂

問農猶記無去年我曾至爾正與婦俱

爲我翦蔥韭爲我炊雕胡爲我買芒屨爲我盛瓢盂而  
今興更王濁醪煩一沾農人默不答俯視牀頭雞良久  
始擡首眼淚偷模糊客是去年至認識無差殊婦是前  
月亡萬事堪嗟吁何以翦蔥韭何以炊雕胡何以買芒

屨何以盛瓢盂勿謂老夫慢奈此啼呱呱衆聞各掩面  
不覺衣衫濡歲月曾幾何朝露晞須臾舉手謝農人悲  
歎徒區區我輩及時樂不飲胡爲乎轟然出門去一醉  
歌鳴鳴

一人發長嘯木葉颯然實一人散短髮臨風粲然韞一  
人穿幽篁一人拾香菌立者坐石者記臆不能盡三人  
忽賭走勢疑馬脫紉疾可追回飄駛豈遜飛隼嗟余強  
鼓勇攬身力亦窘如何不自量扛鼎幾絕臄雖是故態  
狂未免旁觀晒一人正敲火吹煙氣如蜃

放眼入平楚出林路回轉望望衆意沮皆云氣漸喘三

人如不聽迅足敢成蹇咫尺荒井村勇往誓深踐翻然  
與衆別自茲地沃衍野風動禾黍秋色劃溝畎竹馬童  
奔忙水車婦袒跣小姑最妍雅覆眉髮婉變顧影羞不  
言折花笑自撚一路所聞見閒情復不淺劈柿餐紅霞  
品泉煮綠薺風味澹更佳談笑多益善稽首藥王佛影  
堂薄帷卷上有青松林樵徑雜藤蕪徑窮忽洞朗濃黛  
滴遙巘

晚過鬼母祠啼鴉亂林薄夕陽放彩翠明麗互斑駁隱  
隱青帘颺樹罇見簾箔云是更幽亭卽此且閒酌撲鼻  
聞奇香珍羞炙黃雀可下酒一斗絕叫喜跳躍頃刻風

卷雲一盤已揮霍捫腹貪餓嚙浮白縱狂嘍雙鬢亦慧  
絕纖手相酬酢橫波殊可人出語何婉約紅臉潮微渦  
妙叻雜諧謔留賓恍忘返拊掌大笑樂我儕嗟風塵蠟  
展能幾著市井從誼囂官場受束縛眼猶空古今情實  
契林壑茲游始一放毋怪氣磅礴歸家擁鐙火展轉睡  
難著勝景猶在日夢境入寥廓作詩敘梗概所愧才孱  
弱明示同游人敢謂非苟作

暮秋作

自從汾水雁南飛對酒無言獨掩扉十日菊花秋夢醒  
四鄰砧杵夜鐙微吾生落拓官猶拙何處飄零客未歸



又是拂窗風一陣葉聲乾盡淚霑衣

詩關風化不可不慎重然專以此求詩便陋矣今人好輕詆古人於其出處之際稍有可議者輒侈口集矢不復問詩之工拙何如尤爲可歎顧予豈甘爲名教罪人者惟不欲說隨園所謂大帽子話耳

偶然一唱足三歎出處求詩合在寬李白好仙仍酒客王維佞佛是伶官算來去古齊梁近看到移人鄭衛難若道杜陵粗服好不應翠袖怨天寒

讀吉川元春傳作長歌兼題馬山陣圖及其自書

太平記後

山陽莽莽風雲起人龍乃見毛利氏咄咤草木皆刀兵震懾旌旗之所指蕩爲一片青燐墟前殲陶賊後尼子防長豐筑如拉枯石雲隱伯供驅使徑將角逐中原場謾道山中鹿未死生兒應如孫仲謀兩川才略俱絕儔惟公沈機最持重孰肯僥突爭先籌當其紫髯一颯放駸駸早已起驂騑嚴島祠頭大風雨高良山上急鞞鼓若論永祿以前功駕馭應仍繫乃父陰風慘澹大將旗列幕無聲雲四垂三軍縞素舉哀日滿目河山霑淚時公平慟哭忽提劍蹶然而起非不悲眼看烽火次第逼

忍令兵氣須臾衰誓慰先靈梟首惡俄頃殺聲振寥廓  
敵皆麀怯鹿斯奔公能虎騰馬亦躍直可隻手長淮支  
真堪六尺遺孤託忽傳京闕煙塵生阿瞞鐵騎何縱橫  
飄零大樹烏啼府嗚咽悲笳月照營將家運盡金盤倒  
英雄本合見機早休道閒爭打劫基從來難奈投懷鳥  
因但雲連播備州居然赤壁鬪曹劉綸巾羽扇決全勝  
紫蓋黃旗據上游星斗滿天光徹夜魚龍一陣氣吹秋  
畢生遺恨高松水險是降旛出石頭自此公心慘不樂  
摩挲髀肉憶疇昨記得馬山軍夜鏖其時風烈雪紛作  
鐵蹄蹴裂寒梅花名公馬大醉搖頭笑自若不期一蹶事蹉

跽悲夫末路氣蕭索今我長歌重歎嗟阿翁遺集名青

霞

毛利元就  
青霞集一卷

橫槩登壇整而暇韜鈴餘事猶堪誇看公一

部太平記握筆毋乃初心差枉以講和了殘局幸免折  
戟終沈沙十三州土未全復此四十卷空傳家嗚乎此  
四十卷空傳家

田中內閣書記官長

光顯

芭蕉庵招飲和其重陽日

與山縣大臣唱酬原韻以呈

休比芭蕉雪裏強一庵自帶綠天光葉微欲脫知秋杪  
人澹無言愛夕陽側帽而來何用拒銜杯以外偶然忘  
詩成抵得王維畫多是當年鞞口莊

滿城風雨幾曾強，爽翠西山放霽光。  
簾綠茶香出修竹，酒黃花氣澹重陽。  
從何欲放風塵入，到此真堪曆日忘。  
多事反他招隱賦，眼前松桂護幽莊。  
末力哦詩愧弩強，今來忝領好風光。  
春雖然小連佳節，菊未全無勝豔陽。  
石面苔蒼秦篆缺，井眉泉碧漢機忘。  
感君愛客中觴詠，置驛何須說鄭莊。  
豪華未敢鬪家強，撤去畫簾銀燭光。  
惠子觀魚樂濠上，山公倒馬醉襄陽。  
襟如夜月虛無限，帽有秋花落已忘。  
安得多情芳草綠，重來春滿午橋莊。

冬夜玉池仙館話雨用主人原韻

關河柳葉已紛飛，取次蘭衰菊漸稀。  
便道花銷英氣盡，可憐雨較暮愁微。  
藥匳香澹拈紅豆，茶竈煙溫昵綠衣。  
未信吳娘宜水閣，夢樓今夕醉相依。  
柳橋離妓在坐  
侑酒故有此戲  
墨梅鈿笛興遄飛，餘事風流似此稀。  
讀畫三千神韻遠，品詩廿四性情微。  
酪羹更乞中廚譜，蘭燼仍熏半臂衣。  
忽憶怯寒人白髮，一鐙窮旅獨因依。

關雪江先生十年祭賦此志感

歲云暮矣墨之潰，哀笛淒清和淚聞。  
抔土十年碑未樹，心香一瓣字空焚。  
遺編賸見叢殘墨，舊雨多悲聚散雲。  
今日亦隨流水去，幾時重此醉斜曛。

除夕


拈斷吟髭不敢眠  
人間此夕獨堪憐  
賣文贏得癡千貫  
磨墨消將齒一年  
歲以盞鐙爲殿後  
春於杯酒讓籌先  
暗中吹起梅花氣  
已是雞鳴五夜天

柳南集卷七

249

58

249  
4  
53



249

53

南集

三二

099294-001-5

249-53

槐南集

森 槐南/著

M45

DBV-1729

